

Uunga

allannguutissatut siunnersuut

**Siunnersuut uunga: Imigassaq pillugu Inatsisartut Inatsisaat nr. xx, xx. xxx 2018-imeersoq**

Aappassaaniigassanngorlugu Naalakkersuisunit saqqummiunneqartoq.

Uunga Inatsisartut inatsisaanut qulequtaq

**1.** Inatsisartut inatsisaanut qulequtaq ima oqaasertalerneqassaaq:

Imigassaq pillugu Inatsisartut Inatsisaat nr. xx, xx. xxx 2017-imeersoq

Uunga § 22

**2.** § 22 kingorna imm. 1-ip kingorna immikkoortoq nutaaq ilanngunneqassaaq:

” *Imm. 2.* Pisiniarfimmi ilinniartut saqisutullu ilinniartut Imm. 1-imut ilanngunneqanngillat. Ilinniartut inunnit 18-it sinnerlugit ukiulinnit najorneqartuarnissaat qulakkeerneqassaaq”

Uunga § 25

**3.** § 25 ima oqaasertalerneqassaaq:

” **§ 25.** Imigassanik aalakoornartortalinnik tuniniaaneq pisinnaavoq ataasinngornermiit tallimanngornermut nal. 09.00-18.00.

*Imm. 2.* Imigassanik aalakoornartortalinnik arfininngornikkut tuniniaaneq illoqarfinni pisinnaavoq nal. 11.00-15.00 nunaqarfinnilu pisinnaalluni nal. 10.00-13.00.

*Imm. 3.* Sapaatini nalliuttunilu imigassanik aalakoornartortalinnik tuniniaasoqaqqusaanngilaq.”

Uunga § 26

**4.** § 26-p kingorna imm. 2-p kingorna immikkoortoq nutaaq ilanngunneqassaaq:

” *Imm. 3.* Imm. 1-imi aalajangersakkat apeqquataatinnagit ukiutoqqami aamma juullip-aappaani nal. 12.00-03.00 aalakoornartortalinnik imigassartortitsisoqarsinnaavoq.”

Tamatuma kingorna imm. 3-6 tassaalissapput imm. 4-7.

## Uunga § 27

**5. § 27, imm. 2** ima oqaasertalerneqassaaq

” *Imm. 2.* Tamatumunnga taarsiullugu meqqit, saqqarmiuusat, ilisarnaatit takussutissalluunniit allat atuisup imigassanik aalakoornartulinnut tunngassuteqartutut paasisinnaasai atornerisigut inerteqqut avaqqunneqaqqusaanngilaq.”

## Oqaaseqaatit nalinginnaasut

Inatsisissamut siunnersuutip qulequtaa 2018-imi akuerineqartussatut allaqqasoq Naalackersuisunit paasineqarpoq. Inatsisissatut siunnersuut UKA 2017-imi akuerineqartussaammat maanna Naalackersuisut inatsisissatut siunnersuutip qulequtaa 2017-imi akuerineqartussatut aaqqippaat.

Ilaqutariinnermut Peqqissutsimullu Ataatsimiititaliap kissaatigaa § 22-mi 18-inik ukioqarnissamik piunasaqaatip maleruartaannginnissaanut periarfissaqassasoq, tamanna ilinniartitaanermik siunertaqarpat.

Inatsisissatut siunnersuummi saqqummiunneqartumi imigassanik aalakoornartortalinnik tuniniaanermut ammasarfiit nal. 09.00-13.00 ima allanngortinneqassasut nal. 11.00-15.00. Ilaqutariinnermut Peqqissutsimullu Ataatsimiititaliap kissaatigaa nunaqarfinnut tunngatillugu arfininngornikkut nal. 10.00-13.00 imigassamik tuniniaanissamut akuersisoqartarsinnaassasoq.

Ilaqutariinnermut Peqqissutsimullu Ataatsimiititaliap aamma kissaatigaa ukiutoqqami aamma juullip-aappaani imigassartortitsisoqarsinnaassasoq.

Tamatuma saniatigut nr. 4-mut oqaaseqaatini erseqqissarneqarpoq imigassaq pillugu pilerisaaruteqarnissaq inerteqqutaagaluartoq suliliffeqarfiit aningaasanik tapiissuteqartarnissaat periarfissaqassasoq.

Aappassaaneerinninnermut ataatsimiititaliap isumaliutissiissutaanut innersuussisoqarpoq.

**Allannguutissat aalajangersakkat ataasiakkaanut oqaaseqaatit**

## Uunga nr. 2

18-inik ukioqarnissamik piunasaqaat maleruarneqartariaqanngilaq pisiniarfinni ilinniartut saqisunngorniartullu ilinniarnerminnut atatillugu imigassamik aalakoornartortalinnik tuniniaasariaqassappata imigassartortitsisariaqassappatalu. Inuusuttut 18-it inorlugit ukiullit inuttut 18-it sinnerlugit ukiulittut inersimatiginissaat naatsorsuutigineqarsinnaanngimmat ilinniartut tamatigut 18-it sinnerlugit ukiulinnik peqateqartarnissaat qulakkeerneqassaaq, taamaalilluni ilinniartoq isumagisinnaanngisaminik, soorlu nalunngisamik 18-it inorlugit ukiulimmik imaluunniit allanit takuneqarsinnaasumik aalakoortumik itigartitsinissamik, nalaataqannginniassamat.

## Uunga nr. 3

Aalajangersakkami inatsisit malillugit ullut piffissallu imigassamik aalakoornartortalimmik tuniniaasinnaaffiit aalajangersarneqarput.

Inatsisinut atuuttunut tunngatillugu imigassamik aalakoornartortalinnik ulluinnarni tuniniaasarnermut ammasarfiit allanngunngillat, taamaattumik ulluinnarni imigassamik tuniniaasoqarsinnaavoq nal. 09.00-18.00.

Illoqarfinni arfininngornikkut ammasarfiit allanngortinneqarput nal. 11.00-15.00 innuttaasut nangikkiareerlutik imigassarsiniarlutik pisiniarfinnukartarnissaat pinngitsoortinniarlugu. Nunaqarfinni arfininngornikkut ammasarfiit allanngortinneqarput nal. 10.00-13.00, nunaqarfinni pisiniarfiit illoqarfinni pisiniarfinnut sanilliullugu ammasarfii allaanerusinnaasarmata.

Sapaatini nalliuttunilu imigassamik aalakoornartortalinnik tuniniaasoqaqqusaanngilaq. Ullut nalliuttut siunnersuummi § 2, imm. 7-imi nassuiarneqarput.

## Uunga nr. 4

Ukiutoqqami imigassartortitsisarnermut ammasarfinnut tunngatillugu aalajangersakkami malittarisassat atuuttut aalajangiusimaneqarput. Juullip-aappaani imigassartortitsisinnaaneq annertusineqarpoq taamaalilluni nal. 12.00-03.00 imigassartortitsisoqarsinnaassalluni.

## Uunga nr. 5

Meqqit, saqqarmiusat, ilisarnaatit assigisaallu atoqqusaanngillat. Imigassamik aalakoornartulimmik akulinnut assingusunik nioqqutissianik, soorlu nioqqutissiat 2,25% ataallugu aalakoornartortalit imigassanut 2,25% sinnerlugit aalakoornartortalinnut paarlaanneqarsinnaasunik, nittarsaassisoqaqqusaanngilaq.

Aalajangersakkami aningaasatigut tapersiinnikkut suliffeqarfiup ilisarnaataata soorlu atisanut timersuutitut atorneqarsinnaanera akornuserneqanngilaq. Aalajangersakkami neriniartarfiup imaluunniit imigassartortitsisarfiup ussasaarinermit atatillugu nammineq atiminik ilisarnaatiminillu atuinissaa akornuserneqanngilaq. Suliffeqarfiulli atia ilisarnaataalu atorlugit aningaasanik tapersiinermit ussasaarinernullu atatillugu assit allassimasulluunniit imigassamut aalakoornartortalimmut innersuussisut atorneqaqqusaanngillat.